



**Broj: 01-241/17**  
**Vareš, 30.11. 2017. godine**

Na osnovu člana 13. Zakona o načelima lokalne samouprave u Federaciji Bosne i Hercegovine ("Sl. novine F BiH", broj 49/06 i 51/09), te člana 7. i 22. Statuta Općine Vareš (prečišćeni tekst), broj: 01-162/12 od 11.09. 2012. godine, Općinsko vijeće Vareš, na 12. sjednici održanoj dana 30.11. 2017. godine, d o n o s i

## **O D L U K U**

### **o zastavi Općine Vareš i načinu njene upotrebe**

#### **I – OPĆE ODREDBE**

##### **Član 1.**

Ovom Odlukom utvrđuju se izgled, sadržaj i likovno rješenje zastave Općine Vareš, kao i način njene upotrebe.

#### **II – IZGLED I SIMBOLIČKO ZNAČENJE ZASTAVE OPĆINE VAREŠ**

##### **Član 2.**

Zastava Općine Vareš (u daljnjem tekstu: Zastava) ima podlogu bijele boje, koja simbolizira čistoću i mir.

Omjer visine i širine Zastave je 1:2.

Na Zastavi se nalazi grb Općine Vareš, definiran odlukom Općinskog vijeća Vareš, broj: 01-161/02 od 17.10. 2002. godine.

Grb Općine Vareš zauzima četiri šestine visine Zastave i lociran je u njenom središtu, po visini i po širini.

Grb Općine Vareš je s vanjske strane omeđen tankom zlatno-žutom niti.

Ispod grba Općine Vareš velikim zlatno-žutim slovima ispisano je VAREŠ. Visina slova iznosi jednu osminu visine Zastave uz jednak razmak između donjeg dijela grba i donjeg ruba Zastave. Razmak između prvog slova i lijevog ruba Zastave, odnosno razmak između posljednjeg slova i desnog ruba Zastave iznosi po jednu šestinu širine Zastave.

##### **Član 3.**

Likovno rješenje Zastave sastavni je dio ove odluke.

### **III – UPOTREBA I ISTICANJE ZASTAVE**

#### **Član 4.**

Zastava se ističe:

- na zgradi Općine Vareš;
- u dane državnih praznika na objektima u kojima su smještena javna poduzeća i ustanove i na jarbolima i stubovima duž gradskih ulica;
- u drugim slučajevima pod uvjetima i na način određen Zakonom.

#### **Član 5.**

Zastava se može isticati:

- na objektima u kojima su smješteni organi i službe Općine Vareš za vrijeme trajanja općinskih svečanosti;
- na objektima privatnih poduzeća u dane državnih praznika;
- prilikom međunarodnih susreta, takmičenja i drugih skupova na kojima sudjeluje ili na kojima je prezentirana Općina Vareš, u skladu s pravilima i uobičajenom praksom održavanja takvih skupova;
- prilikom proslava, svečanosti i drugih masovnih manifestacija i skupova koji su od značaja za Općinu Vareš.

#### **Član 6.**

Zastava se može upotrebljavati na kulturnim, sportskim, promotivnim i humanitarnim manifestacijama na kojima se predstavlja Općina Vareš.

#### **Član 7.**

Zastava se spušta na pola koplja u danima žalosti na području Bosne i Hercegovine, Federacije Bosne i Hercegovine, Zeničko-dobojskog kantona i Općine Vareš.

#### **Član 8.**

Zastava se ne može upotrebljavati kao robni ili uslužni žig, model ili uzorak, niti kao bilo koji drugi znak za obilježavanje robe ili usluge.

#### **Član 9.**

Kada se Zastava ističe zajedno sa zastavom Bosne i Hercegovine, odnosno Federacije Bosne i Hercegovine, odnosno Zeničko-dobojskog kantona, isticanje se vrši prema propisima Bosne i Hercegovine, Federacije Bosne i Hercegovine, Zeničko-dobojskog kantona i Općine Vareš.

#### **Član 10.**

Zastava se ne može upotrebljavati na javnom mjestu ako je oštećena, pohabana ili na drugi način svojim izgledom narušava ugled i dostojanstvo Općine Vareš.

Oštećena ili za upotrebu nepodobna Zastava povlači se iz upotrebe.

### **IV – KAZNENE ODREDBE**

#### **Član 11.**

Pravna osoba koja prekrši odredbe članova 4., 5., 7., 8. i 10. ove odluke kaznit će se novčanom kaznom u iznosu od 500,00 KM.

Za prekršaj iz prethodnog stava kaznit će se i odgovorna osoba u pravnoj osobi novčanom kaznom u iznosu od 200,00 KM.

Fizička osoba koja prekrši odredbe članova 8. i 10. ove odluke kaznit će se novčanom kaznom u iznosu od 100,00 KM.

### **Član 12.**

Postupak za naknadu štete odnosno za prekršajnu odgovornost pokrenut će se i protiv svake osobe koja namjerno ošteti Zastavu u vrijeme njene službene upotrebe.

## **V – PRIJELAZNE I ZAVRŠNE ODREDBE**

### **Član 13.**

Kontrolu i nadzor nad provedbom ove odluke vrši općinska komunalna inspekcija.

### **Član 14.**

Ova Odluka stupa na snagu osmog dana od dana objavljivanja na općinskoj oglasnoj ploči.

**PREDSJEDAVAJUĆI  
OPĆINSKOG VIJEĆA**

**Kenan Kamenjaš**



Ova odluka je objavljena na općinskoj oglasnoj ploči dana 01.12. 2017. godine.

**OPĆINSKI NAČELNIK**

**Zdravko Marošević**

# **O b r a z l o ž e n j e**

## **1. PRAVNI OSNOV**

Pravni osnov za donošenje ove odluke sadržan je u odredbama čl. 7. i 22. Statuta Općine Vareš (prečišćeni tekst), broj: 01-162/12 od 11.09. 2012. godine.

## **2. RAZLOZI ZA DONOŠENJE**

Statut Općine Vareš dopušta mogućnost da Općina Vareš ima svoju zastavu, budući da čl. 7. Statuta glasi:

"Općina Vareš ima svoj grb, a može imati i druge simbole i obilježja (zastava, himna, dan Općine i sl.), o čemu odlučuje Općinsko vijeće.

Upotreba odnosno korištenje simbola i obilježja Općine Vareš utvrđuje se odlukom Općinskog vijeća."

Zbog toga je Općinski načelnik inicirao donošenje ove odluke.

## **3. FINANCIJSKA SREDSTVA POTREBNA ZA PROVEDBU ODLUKE**

Za realizaciju ove odluke potrebno je planirati sredstva u općinskom proračunu/budžetu za 2018. godinu.

Ovlašteni predlagač:

**OPĆINSKI NAČELNIK**

**Zdravko Marošević**